

Nunatsinni Nakorsaaneqarfik

Angajoqqaanut paasisutissiissut

Toqqusaarluut kunissuunnikkut tunillaattartog

(mononucleosis infectiosa)

Kunissuunnikkut tuniluuttartumik toqqusaarluttoqarsimammatt ilitsersuut atuaruk meeqqallu kunissuunnikkut tuniluuttartumik toqqusaarluuteqarnermut ersiuteqarpat sulisut tamatumingga ilisimatikkitt.

Toqqusaarlunneq tappiorannartumik virus-imik patsiseqartog toqqusaani unermi imeqqutammi qinersinik suanngatitsisinnaavoq.

Tunillatsinneq

Nappaat qanimut toqqaannartumik attaveqatigiinnikkut qiseq aqqutigalugu soorlu kunissuunnikkut tunillaattarpoq. Nalinginnaasumik inooqataanikkut nappaatip tuniluussinnaanera annikitsuararsuavoq. Amerlanerit meeraatillutilli ersiuteqartinnagu nappaatigereersarpaat. Nappaammut ersiutit inuusuttuni takussaanerupput. Inersimasut 95 %-iisa nappaat atoreersimasarpaat taamaasillutillu inuunerup sinnerani akiuussutissarsiffigisarlugu.

Tunillaasinnaaffik: Napparsimalernermit ilaanni ukioq ataaseq pallillugu tappiorannartog virus qisermissinnaasarpoq.

Nappaammut ersiutit

Tunillatsinnermit napparsimalernissap tungaanut sivisussusaa: Sap. ak. 4-7.

Nappaat nuallunermut ersiutinut assingusunik qasoqqanermik, illigisaqannginnermik niaqorlunermillu ersiuteqarluni aallartittarpoq. Tamatuma kingorna toqqusaarluutaalersarpoq iisiniarnermut ajornakusoortitsisumik toqqusaat neqitaat pullangaatsialerlutik qalipperlutillu. Anernikilliuutaasinnaavoq timimi qinersit pingaartumik toqqusaaniittut suanngarsinnaapput ippinnarsillutillu. Sap. ak. marluk angullugit kissarneqaataasinnaasarpoq. Ilaatigut tinguk sunniivigineqarsinnaasarpoq, massak suanngarluni aniorninittoqarsinnaavorlu. Meeqqani mikisuni nappaat ersiuteqanngikkuni annikitsuinnarmik ersiuteqarsinnaasarpoq.

Nakorsartinneq

Nappaat nakorsarneqarsinnaanngilaq.

Taama nappaateqartogartillugu maleruagassat

Annertuumik qasoqqassutaasarnera pissutigalugu sivisujaamik qasuersaartoqartariaqarsinnaavoq. Nappaat atuutsillugu timip annertuumik atornissaa pinaveersaarneqassaaq.

Meeqquerivimmukaqqinnissaq

Meeqqap nalinginnaasumik peqqissusaa apeqqutaatillugu meeqquerivimmut utertinneqarsinnaavoq.